

17. Maj 2017

Siunissami aalisarsinnaanermut akuersissutip aqutsisoqarfimmi ataasiinnarmi atorneqartalernissaa - taamatullu aqutsisoqarfiup "Kalaallit Nunaata sinnerata" siunissami aqutsivinnut immikkoortunut arfinilinnut aggornilersorneqarnissaa (Maniitsoq, Paamiut, Qaanaaq, Sisi-miut, Kalaallit Nunaata kujataa aamma Tasiilaq) anguniarlugu sinerissamut qanittumi qaleralinniarneq pillugu nalunaarut allangorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Michael Rosing, Demokraatit)

Siumut-miit siunnersuuteqartoq qutsavigaarput.

Siumumi pingaarluinnartut isigaarput, nunatsinni aalisarnikkut naapertuuttumik ineriartortuarnissaaq aqutissiuuttuassallugu. Sinerissami aalisarnikkut aaqqissuussisimanerup allangortinnissaanik, eqaallisaanissamillu oqallinneq ataavartuuvoq, tamannalu imminermi tupinnanngilaq, nunatsinni aalisarneq inuussutissarsiutini annerpaammat, pisariaqartuarlunilu pitsanngorsaajuar-nissaaq.

Siumumiit iluarisimaarluakkatsinnik, ukiut kingullerni nunatsinni sumiiffippassuarni, aalisarnermut akuersissutinik pigisaqaqqilersut amerlisippagut, tamannalu ilaqtariippassuarnut pitsaasumik kinguneqarpoq, inuussutissarsiornikkut imminnullu napatinnermut isumalerujussuuvoq. Sumiiffippassuarnilu immami pisuussutitta atorlugit inuussutissarsiorsinnaanermut periarfissat atornerunerannik kinguneqarluarpoq. Aamma nunatta ataatsimut aningaasarsiornera tassani eqqarsaatigalugu.

Takornartaanngilaq, aqutsiveqarfinni aalisartut aqutsiveqarfik allameersut maannakkut aalisarsinnaammata, ukiup qanoq isinera apeqqutaatillugu sumiiffimmiit sumiiffimmut aalisarneq malersorneqartarmat. Taamaattorli aamma tamassuma kingunerisarpaa, sumiiffimmi aqutsiveqarfimmi piasaanit ilanngaataasarnerat, tamannalu aqutsiveqarfimmi sumiiffinniittut ilaatigut tupinnanngitsumik naapertuilluarnertut isigineq ajorpaat.

Soorunami aamma ajornartorsiutit allat uani eqqartorneqarsinnaagaluarput, soorlu; maannak-korpiaq avannaa eqqarsaatigalugu, tunitsiviit, toqqorsiviit, amerlanerpaat ulikkaaqqapput, ilaatigut februarimili ulikkaaqqallutik, tamassuma kinguneraa nunaqarfimmi amerlasuuni inuussutissarsiorneq uninngavoq, ilaqtariippassuit inuuniarnermikkut aningaasarsiornikkut tunngaviat uninngalluni, tamannalu soorunami ulluinnarni inuuniarnermikkut unamminartunik malitseqarpoq, pilersuiniarnermikkut, akilersukkallu eqqarsaatigalugit.

Taamaattumillu Siumumiit isumaqarpugut, aalisarnikkut akuersissutit, aammalu aqutsiveqarfiit qanoq aaqqissuussaananerat kisimi tunngaviunngimmat. Aammalu ataqatigiissillugu tunitsiviit aaqqissuussaananerat ineriartorteqqinnissaallu pisariaqarlunnarmat pilersaarusiorlugulu aaqqissuunnissaat. Siumumiillu sakkortuumik piumasarissavarput, tunitsiviit ukioq kaajallallugu tunitsivigineqarsinnaanissaanut aaqqissuussinerit pisariaqarmata, tamanna aalisarnikkut aaqqissuusseqqinnermut ataqatigiissillugu suliarisariaqarmat.

Siumumiit erseqqissassavarput, nunatsinni aalisakkat pisuussutivut inuiaqatigiit tamarmik pigimatigut. Taamaattorli naapertuilluarnikkut atuisoqarnissaa pingaartilluinnarparput, minnerunngitsumik inuiaqatigiinnut naleqqussakkamik aaqqissuussisoqassasoq, tamanut amerlanerpaanullu naapertuuttumik.

Piujuaannartitsineq tunngavigalugu nunatsinni pisuussutitsinnik atuinissarput, Siumumi tunngavigaarput. Taamaammat aamma pisassiisarnermut, aalisarsinnaanermullu akuersissutit pillugit aamma. Aaqqissuussineq sumiiffinni suli pisassiiffiunngitsuni pisassiissutinik pilersitsinissap angujartuaarneqarnissaa pissusissamisoortutut isigaarput.

Siunnersuutip aappassaaneerneqartinnagu ataatsimiitaliami susassaqartumi suliarineqassasoq innersuupparput.

Knud Kristiansen
Siumut.